



Tir Yimiyim

www.tiryimiyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimiyim@gmail.com

TAPAK 8

Yangia anidakangma :

Tir Yimiyim

tiryimiyim@aolima

tir yimiyim

TAPAK 10



RAJASTHAN ROYALS

White supremacy ya kiralongraba lir: Tir Biden

Rajasthan Royals-i Covid-19 den raratsü atema sen crore 7.5 tenla agütsü

VOL. XVIII NO. 195 (ADOK 195) DIMAPUR

ROGONÜ (FRIDAY)

RONGCHII (APRIL) 30, 2021

₹ 5.00

COVID-19 Nagaland: Nisung 181 dak putet

Kohima, April 29 (TYO): Brihostibarnü Nagaland nung nisung 181 dak COVID-19 putet aser parnok züngsema nisung ajak agi 13,750 kümogo.

"Tanü nisung 181 dak COVID-19 putet. Parnokji Dimapur nung 132, Kohima nung 42, Mokochung nung 3 aser Kiphire, Mon, Phek o Zunheboto nung kaka (1) lir" ta State Nodal Officer for Integrated Disease Surveillance Programme, Dr Nyanthung Kikon-i metetdaksü.

Külen, tanü nisung 29 tashi taneptsü angu. parnokji Kohima nung 17 aser Dimapur nung 12 lir aser parnok züngsema nisung 12,212 taneptsü nguogo. Tang parnok 1,072 anepaludar, ta Dr Kikon-isa ashi.

Nagaland nung taneptsü angurji 88.81% dang lir aser tang anepalurtem rongnung nisung 68 dak shirangba yimya terara lir, 29 oxygen agüja anepaludar aser 2 ventilator nung lir. Tanüngba nisung 973 dakbo shirangba yimya kecha mali, ta paisa ashi.

Nagaland nung COVID-19 puteter nisung 101 tashi süogo saka parnok 10 bo tanga timtem ajanga asü aser nisung ka astüba kuli bushitepdar. Nisung 365

tashi tanga state temi ogo, ta Dr Kikon-isa metetdaksü.

Nagaland nung COVID-19 alitsü akok ta temolung melemi bilemba sample 1,46,190 tendangogo. RT-PCR ajanga 78,487, TrueNat ajanga 38,143 aser Rapid Antigen Test ajanga 29,560 tendang.

Dimapur district sülen Kohima District Task Force on COVID-19-ia tesem mashii nung COVID-19 sample bendentsü tenzüko.

Bodbar nungi iba mapa tenzüko aser tang tashi nung sample 57 bendenogo ta ketdangsurtemi ashi.

Bodbar tashi nung Nagaland nung nisung 1,56,890 nem COVID-19 vaccine dose 1,97,549 agütsüogo, ta State Immunization Officer Dr Ritu Thurr-ia metetdaksü.

Vaccine agirtemji frontline workers 48,796, healthcare workers 14,486 aser arishi küm 45 ser temapur 93,608 lir, ta paisa ashi.

Nagaland nung nisung 40,659-i dose tanabuba agiogo aser parnok rongnung frontline workers 24,001, healthcare workers 9,660 aser arishi küm 45 ser temapur 6,998 lir, ta Dr Thurr-isa shisem.

Nagaland nung meiwa sodi agütsür

Dimapur, April 29 (TYO): Nagaland state sorkari April 30, 2021 nungi tenzüka school aser college ajak nem summer vacation agütsüba osang metetdaksüogo.

Iba mapang coaching/vocational institutions/student hostel ajak shibangtsü tetuyuba agütsü. Ajisüaka, online/

distance agütsü melar aser agütsü ayongzüker ta sorkarisa ashi.

Külen, Directorate of School Education (DoSE)-ia Nagaland nung school (Govt. & Private) ajak April 30, 2021 nungi Summer Vacation agütsür ta sangdong balaka nung metetdaksüogo.

Assembly elections atema Exit Polls osang metetdaksür

New Delhi, April 29 (Agencies): West Bengal assembly election nung shilem tibuba aser tatembangba tanü agiba sülen Exit Polls aikati State pezü aser Union territory ka nung election agiba nung takok angurtem asadangtetba osangtem metetdaksüogo.

Tawa election agibaji West Bengal (menden 294), Assam (menden 126), Tamil Nadu (menden 234), Kerala (menden 140) aser Puducherry (menden

30) liasü. Tanü nikongdang tashi nung Exit Polls balala ajanga Assam aser Puducherry nung BJP-i takok angütsü aser West Bengal nung TMC den anasatapa tokteper ta metetdaksüogo.

Külen, Tamil Nadu nung DMK-Congress-i AIADMK-BJP madak takok angütsü aser Kerala nung LDF-i maneni takok angütsü ta Exit Polls ajanga metetdaksüogo.

Nagaland nung April 30 nungi May 13 tashi teinyaktsütem metetdaksür

Dimapur, April 29 (TYO): April 27, 2021 nü Nagaland Cabinet-i lemteba ama Brihostibarnü state sorkari Covid-19 azioktsü atema inyakyim tasen kar metetdaksüogo.

Nagaland state sorkari tetuyuba tasen agütsüba ya April 30 nungi May 13, 2021 tashi benschitsü.

LOKTITULUADENSHIBA NOKTANGER:

Iba tenokdangba mapang Nagaland nung cinema halls, swimming pools, gymnasiums, entertainment parks, auditoriums, theatres, assembly halls, sports complexes, museums, libraries, re-creation centres ajak shibangtsü ta sorkari ashi.

Sorkarisa lokti tulu adenshiba noktangogo aser containment zones nung madenba tesemtem nung lokti, yimten, saisapong, shisaliok, sobaliba aser tamangba yimsü dak sendakba sentongtem agütsü melaogo.

Ajisüaka, item sentong agiba hall/venue/ground nung nisung 30% mesüra 100 dang adenshitsu, ta sorkari ashi.

Sorkarisa District Task Force temi pei pei telongtet dak apir telemtetbatem agütsü tashi agütsüogo.

POINTS OF ENTRY (PoE):

Tangalen nungi Nagaland-i arurtem tsünglanglen agüja aliba Points of Entry (PoE) ajanga dang arutsü aser COVID-19 Screening Test agütsü.

- Dimapur Airport
- Dimapur Railway Station
- Dimapur- New Field Check Gate & Dillai Gate
- Kohima- Khuzama;
- Mokokchung- Tsutapela & Watiyongpang;
- Mon- Naginimora & Tizit;
- Wokha- Bhandari
- Phek- Lanye Junction & Akash Bridge.

Temalen agüja aliba lenmang dak alaka tanga lenmangtem ajanga Nagaland-i arutsü memelar aser koda masüba kar

ajurura State Home Department dang nungi temelaba meshitsu, ta sorkarisa metetdaksüogo.

TANGALEN NUNGI ARURTEM:

Nagaland-i arurtemi ghonda 72 jelia agiba Covid-19 indang negative RT-PCR/TrueNat/CBNAAT test report bener arutsü. Negative report bener arurtemi anogo tenetnü atema self-isolation/quarantine asütsü aser tangartem anogo 10 tashi self-isolate/quarantine asütsü.

Nagaland-i Military/ Para Military nübotem arura Military/ Para Military formations/units-i parnok dak RT-PCR/ TrueNat/CBNAAT ajanga COVID-19 tendangtsüba aser anogo tenetnü (7) quarantine asütsü.

DTF lenisüba kübok Village Councils/Urban Local Bodies-i pei pei telongteti bendangertem aruba jangjatsü aser iba osang DTF nem sangoktsütsü.

Tangalen nungi arurtemi Quarantine inyakyim mesüra COVID-19 teinyaktsü mebenshira local administrative officer/DTF nem osang sangoktsütsü.

Iba SOP ya state ajungalen amshitsu aser District Task Force, Urban Local Bodies, Village Authorities mesüra lokti tentetemi teka aitsü makok, ta Nagaland sorkari metetdaksü.

North East state nungi road/air/train ajanga Nagaland-i arur aser transit passenger kati <https://covid19.nagaland.gov.in> nung aliba self-declaration form nung transit passenger ka ta zülüoktsüba aser Nagaland nung manenzüki aotsü.

Khu abenba garitem Nagaland-i aitdaksütsü saka point of entry nung driver aser attendant ajak medical screening asütsü. Myanmar den international border maneni shibangtsü.

Nagaland kübok private & passenger vehicles district balala tsüngda senzüsönongtsü melar

saka gari ka nung 50% dang amentsüba, ta sorkarisa metetdaksüogo.

D O K A N / SHISHILEMBADAK:

Containment zones nung madenba tesemtem nung Shopping Malls lapoktsü melar saka COVID-19 azioktsü atema SOP akangakanga benschitsu.

Dimapur nung Hongkong Market, New Market aser Kohima nung BOC Market amala marketing complex nung anogo ka nung dokan 30% dang lapoktsü melar aser ibaji pei pei DTF-i telemtetba agütsü.

Yimdong, mapa inyakkak aser gari nung senzüdang mask meinoker dang Rs. 200 senchi achitsü. Dokan kiburtemi hand sanitizers mesüra teka metsükdak ayutsüba aser mapang shia dokan mozü agi merüktetsüba.

Containment zones tema nung aliba Hotels/Lodges/Restaurants aser Barber shops & salons lapoktsü melar.

Tang inyaka aruba ama Private Banks, ATMs, Pharmacies, Medical Clinics, Nursing Homes, Private Telecom Services, Internet Service Providers, Media Houses, LPG, Petroleum outlets lapoktsü melar aser tanga nija office tem nung nisung 50% dang arutsü.

OFFICE:

Kohima aser Dimapur nung aliba Civil Secretariat aser Directorate tem aser district nung sorkar office tem staff 50% dang office-i aotsü melar. Secretariat nung Deputy Secretary ser temapurtem, Directorate nung Deputy Director ser temapurtem aser District office tem nung Head of Office & immediate junior ser temapurtem ajak mapai aotsü. Tanüngba staff tem asoshi AHOD/HOD/Head of Office-i anogo lemsatsütsü.

(Maneni tapak 10 nung...)

Dimapur nung nisung ka rongset; ki 123 rongdok

Dimapur, April 29 (TYO): Brihostibar anepdang Dimapur kübok Burma camp nung kitsükkirong lendong ka atalokdang nisung ka rongset.

Yasüng ayaterm nung mi agi ki 123 tashi mitsü küma rongdok aser arishi küm 25 shi tain asangur ka rongset.

April 29, 2021 anepdang 12:10 ako meta Dimapur kübok Burma Camp nung kitsükkirong lendong

atalokba osang angashiba sülen Fire Station Dimapur (Central) aser Fire Station Dimapur (West) nungi tzü ensepba gari pezü den Fire & Emergency Services telok ka lendong atalokdaki ao.

Iba lendong nung ki 123 tashi rongdok aser Rs 50 lakh shi alangba rongsen akoksa liasü. Mi ensepertemi ghonda 3 shi ka agia miji azioktet aser iba osang zülü tashi nung mi adokba kuli ano mejangja lir.

Ano, April 28, 2021 nikongdang 12:53 ako meta Dimapur kübok Duncan nunga ki ka den Gypsy gari ka rongdok.

Iba osang angashiba sülen mi ensepertem tesem tonga orr mi azioka lir aser iba lendong ajanga Rs 4 lakh shi rongsen samaogo ta asadangteta lir.

Iba mi lendong ya shi akongdang adokba liasü ta kuli ngutetogo.

Nagaland CM-i 11th NAP (IR) BN HQ, Aboi lapoktsü



Deputy Chief Minister aser Home Minister Y. Patton, MLA Eshak, MLA CL John, MLA EE Pangteang aser MLA Thongwang nungertem lia Nagaland Chief Minister, Neiphiu Rio ajanga April 29, 2021 nü Aboi nung 11th NAP (IR) Battalion Headquarter lapoktsüogo.

Dimapur, Rongchii/April 29 (TYO): Nagaland Chief Minister Neiphiu Rio ajanga April 29, 2021 nü Aboi nung 11th NAP (IR) Battalion Headquarter lapoktsüogo. Iba sentong nung Deputy Chief Minister aser Home Minister Y. Patton, MLA Eshak, MLA CL John, MLA EE Pangteang aser MLA Thongwang nungertem dena liasü.

Tesemdang tongti ka ama iba sentong nung jembiba mapang, 2005 küm nüngshilong azüngba mapang nungi timtem balala ajuruaka iba ki renemba atema pelar aser technician, temeket nung aliba yimtsüngtem aser jawan tem dang pelar, ta Rio-i ashi.

11th NAP (IR) yagi state nung kisüing masü saka danga state tem nungia tenüng tajung bener arua lir, kechiaser parnok training kanga junga agi aser nüburtemi parnok kanga akumtsübur, ta Chief Minister-i ashi.

Rio-i parnok dang kechi nung lidir liaka khuret abentsü aser maneni pei mapa nendaka inyaka nüburtem kumzuka ayutsü ajungshia liasü.

Pai DGP aser 11th NAP (IR) Bn. Aboi indang unit commandant dang camp temeket nung süngdong tabu balala atemtsü mepishi aser jawan tem dang maparen balala inyaka mazüngi aser anema alitsü ajungshi.

Maangka anguba mapang akokba jenjang nung tatishitsü tajung yutsütsüla, ta pai ayongzük.

Paisa nüburtem aser temeket nung aliba yimtsüngtem dang jawan tem den amalitep akatsü ayongzük aser loktiliba nung yimjung aser telungjem atema kati ka angateteptsü ajungshi.

Chief Minister-i nüburtem dang COVID-19 asoshi tali kumdangshitsü ajungshi aser wave tanabuba ya tamajungtiba

lir, anungji COVID-19 mozü agitsüla, ta ashi.

Kuli balala ajanga iba headquarter lapoktsü menuba atema Deputy Chief Minister & Home Minister Y Patton-i sasa bilemba ashi. Ajisüaka maparen takok ngua renemtetba atema pelaba lemsatsep. Ali kiburi ali tenla agütsüba atema pai pelaba shisema liasü.

Sentong nung DGP, Nagaland. T. John Longkumer, IPS ajanga o tatsüka jembiba mapang temeket yimtsüngtem nung alir dang lenmang balala nung yariteptsü aser amalitep alitsü ajungshia liasü.

KU tir Howing, Langmeing Angh aser Maopong natia iba sentong nung o jembiba liasü.

Sentong nung adener pela agizükba o DIG (IR) south Chumdamo Jamio, NPS ajanga jembiba aser Pastor PBC, 11th NAP (IR) B. Aboi, Rendamo ajanga iba headquarter meshiteta sarasademtsü.

Kohima nung 29 buba NSF inti mungdang alitsü renemogo

Kohima, Rongchii/April 29 (TYO): Naga Students' Federation (NSF) pur 29 buba inti mungdang agitsü atema Solidarity Park, Kohima nung Hokulbarnü sapang renemogo.

'Towards harmony' omen nung ajemdaker amungtsü aliba mungdang ya mezüngbo Ukhrul district, Manipur kübok Ukhrul jila nung asemnü amungtsü sentong renema liasü, saka COVID-19 tashidak wara mechi tenokdangba balala agüja aliba ajanga mungdang ya anogo ka dang amungtsüsa akum aser tesema melenshia Kohima-i bener aru.

COVID-19 mechi teinyaktsü tesashiba agüja aliba ajanga taküm NSF mungdang nung delegates 150 nungi 200 shi dang adentsü, aser iba mapang SOP tem reteta amshitsü, ta NSF ketdangpurtemi ashi.

Central Organising Committee indang convener,

Subenthung Kithan-i ashiba agi, NSF inti mungdang nung yimya agi Naga nung aliba tesem ajunga aser yimti balala nungi kaketshirtem jaoka aru. Ajisüaka alima tesem ajunga nung tashidak wara agi sünga lir asünung, federating unit tem nungi delegates nisung pongungu aser sub-ordinate bodies nungi nisung ana-na dang jaok.

Tang Naga nung kanga tongtipang tensa ka nung lir, aser Nagaland telungzük aser tezülen yimjung nung alitsü nüngdaker, anungji taküm iba mungdang indang omenji 'Towards harmony' asütsü shimtet, ta pai ashi.

Iba mungdang nung NSF ketdangpur kümsük 2021-23 atema nübu tasen shimtsü aser tir menden atema candidate pongu aser tongti zülur atema candidate ana lir, ta Chief Commissioner of Election Commission, Elu Ndang-i metetdaksü.

(Maneni tapak 10 nung...)

Kohima DTF puri COVID-19 tendanga jaja

Dimapur, Rongchii/April 29 (TYO): State sorkari COVID-19 dak sendakba teinyaktsü agütsüba nung shia aliba ama, Kohima District Task Force (DTF) on COVID-19 puri April 29, 2021 nü Kohima jila kübok Para-Medical aser Ministers' Hill nung tapi agi COVID-19 tendanga liasü.

Iba mapang nüburtem dak

nungi tendangtsü atema sample 37 agizüka liasü.

Iba ama tendangba maparen ya April 28, 2021 nü AG Colony nung tenzüka yangji sample 20 benden liasü. Anogo ana nung tendangtsü atema sample 57 bendenogo.

Kohima district kübok nüburtem dak COVID-19 virus ali mali metettsü asoshi iba maparen ya tenzüka liasü.

PDA sorkari saisapong nung maneni temolung agütsür: Advisor Neikha

Kohima, Rongchii/April 29 (TYO): Nagaland nung People's Democratic Alliance (PDA) ajanga saisapong nung maneni temolung agütsür, ta tanü Advisor, Youth Resources and Sports, Zale Neikha-i ashi.

"Chief Minister Neiphiu Rio tekolakba sür PDA sorkari Nagaland nung saisapong temaba jenjangi ajungkettsü atema nendaka inyaker aser state sorkari temolung agütsüdak tongtipang ka amai lir," ta Neikha-i April 29, 2021 nü State Assembly complex, Kohima nung Multipurpose Hall ka semzüksüba mapang ashi.

Mangdang tajung aliba Chief Minister dener tang aliba sorkari saisapong ya industry ka kumdaktsütsü aser tetoktepeba telung aser tema nung employment agütsütsü atema tajangzük anguba wadang ka kumdaktsütsü sentongtem yanglur, ta pai ashi.

Naga nung dak sempet keta lir aser saisapong nung dangar den kasa lir, anungji saisapong temaba jenjangi ajungkettsü atema sorkari lenmang ajaklen nendaka inyaker, ta Neikha-i sorkar tenüng nung ashi.



Assembly Secretariat complex, Kohima nung April 29, 2021 nü Multipurpose Hall ka lapokba sülen Advisor Zale Neikha den NLA Speaker, Cabinet Ministers, legislators aser ketdangsurtem tangokba noksa ka yangi angur.

Iba sentong kübok ki-o-jen renlokba, asaya balala renloktsü asoshi yimtsüng nungi temaba jenjang tashi terenlok, coach aser training agütsürtem atema sentong balala, chiyongtsü tajungtiba agütsütsü, saisapongertem nem maangka aser scientific training agütsütsü, saisaponger ajungmesotsü atema sempet tem dena lir.

Khelo India kübok Department ajanga ki-o-jen yangluba project tulu pongu

teinyakdak lir, aser ajak ya taruba küm tashinung renemtsü imlar aser ano iba amala project tem tenzüksü lir, ta pai ashi.

IG Stadium, Kohima nung Synthetic Turf inokba nung tajangzük tulu bener arutsüba ngua, Department-i Dimapur, Tuensang, Mon aser Mokochung nung State aser Centre indang scheme balala kübok Synthetic Turfs inoktsü maparen tenzükgogo, ta pai metetdaksü.

Multi Disciplinary Sports

Centre mapa kuma aotsü asoshi Department tejangraba tulu lir, aser iba atema nüngdakba DPR renemer consultant temi agütsütsüba jenjang nung lir, ta pai ashi.

Olympics nung tajungtiba jenjang ngutettsü asoshi India-i meranga inyakba nung tashi itshitsü mechi IG Stadium nung Khelo India State Centre of Excellence (KISCE) amenoktsü shimtetba ajanga state nung saisapongtsü sempet alir nem kishizüng tonga maangka bener

arutsü aser iba yongji pei sempet tali tajungba kumdakja regional, national aser international jenjang nung tokteptsü maangka angutsü, ta Advisor Neikha-i ashi.

Tarutsü nung lanurtem nükjidong tongtetsü asoshi saisapong tsütsü tensa tajungtiba agütsütsü atema PDA sorkari temolung agütsür, ta ashi.

Ki-o-jen yangluba den külemi Department-i saisaponger, coach aser ketdangsur nem takok anguba temaitsü sempet balala agütsüba maparen tenzükgogo, ta pai ashi.

Lanurtem dang pei sempet mesamadaktsüi tajungba kuma amshitsü asoshi ajungshia jembiba mapang, Advisor-i lokti tentet balala dang lenmang ajaklen renloktsü asoshi sorkar den tangatetep nung inyaktsü ayongzüka liasü.

Neikha-isa state nung aliba saisapongertem dang item maangka agia tajungtiba nung sempet amshia state aser linük tenüng nung linük aser international jenjang nung tokteptsü aser konang bener arutsü ayongzüka liasü.

West Bengal nungi arur Mizoram Police 108 dak COVID-19 putet

Aizawl, April 29 (Agencies): West Bengal assembly election nung shilem agir aruba Mizoram Police 108 dak COVID-19 aliba putetogo.

Bodbarñü Mizoram Police 108 dak COVID-19 aliba putet aser Brihotibarnü ano police ka dak putetogo.

Külen, tesüiba anogo ana tsüingda Mizoram nung Assam Rifles sepai 17, BSF nungi 3 aser CAPF nungi 1 dak COVID-19 aliba putetogo.

Arishi küm 40 tain BSF jawan ka dak COVID-19 aliba putet saka pa ya COVID-19 vaccine indang dose anaprong agiogo, ta ketdangsür kati ashi.

Brihostibarnü Mizoram nung nisung 139 dak COVID-19 aliba putetogo. Parnok züingsema nisung ajak agi 5880 kümogo aser iba nungi nisung 13 süogo.

Mizoram nung tang nisung 1,075 anepaludar aser 4,792 taneptsü nguogo.

Bongaigaon district nung ULFA-I tanishir ka khasat

Dibrugarh, April 29 (Agencies): Brihostibar nü Bongaigaon district kübok Besimari nung Assam police-i ULFA-I lennir Dwipen Saud khasetogo.

Saud-i tawa tu ULFA-I Deputy Commander-in-Chief Drishti Rajkhowa nung Western Command indang Commander melenzüka liasü.

Police-i telungpurtem den khatapba sülen Bongaigaon nung aliba civil hospital-i Saud anir ao saka pa süadoker liasü, ta Assam DGP Bhaskar Jyoti Mahanta-i ashi.

"Onoki pa body guard Padum Rai puogo. Onokisa tanga prangpong aser grenade ka ngutetogo" ta Mahanta-isa ashi.

ULFA-I-i nisung kar pur aotsüba tasa atonga lir ta Assam Police-i osang angazükba sülen mita aodang telungpurtem den khatap.

"ULFA-I Western Command-i tongtipang nisung kar pur aotsüba tasa atonger ta onoki osang angazük. Osang tejangja angazükba ajanga onoki tanü mapa takok ngua inyaktetogo" ta Mahanta-isa metetdaksü.

West Tripura DM anema bushisüngdang



Agartala, April 29 (Agencies): Anogo ishika tejakdang West Tripura DM (District Magistrate) Shailesh Kumar Yadav-i Agartala nung kiyimsang dena nisung kar dak teka sangshi aser iba atema bushisüngdang ka tenzükogo.

"West Tripura DM-i aonung marriage hall ana mita aoba atema IAS ketdangsür anati bushisüngdangtsü" ta Tripura Chief Secretary Manoj Kumar-i ashi.

DM-i teintet rogotem, kiyimla, kiyimsang aser police den tim mesüi inyak aser iba ajanga state sorkar nem maaksü bentsür aru.

IAS ketdangsür ana- Kiran Gite aser Tanuhsree Debarma nati iba ken o atema bushisüngdangtsü aser Chief Secretary nem bushitetba osang agütsütsü. Tripura Chief Minister Biplab Deb-i Chief Secretary dang nungi osang meshiba sülen iba luden tentetogo ta osang ka ajanga ashi.

Iba tatalokba atema Sonu Nigam-i anir Rajasthan nungi Pandit Samaj aser nisungtemi West Tripura DM merenshitsu takhangba agütsür.

BJP MLA Asish Das-ibo West Tripura DM mapa nungi anenjang ta takhangba agüja mener lungkak aiter.

Ano, BJP MLA Ram Prasad Paul-i judicial inquiry asütsü

akhangar. "Temeten shitak agütsütsü atema High Court judge kati bushisüngdangtsü" ta Paul-i metetdaksü.

District Magistrate Shailesh Kumar Yadav-i iba tesem nung adenshirtemi CrPC nung Section 144 alema inyakogo ta ashiba video ka social media nung kanga prokshir.

Taoba chief minister Manik Sarkar aser CPIM-i iba ya district magistrate kati inyaksangshiba memesük aser pa iba mapa inyaksü temsüa mali ta shiogo.

Külen, Assam nungi Congress lennir Gaurav Gogoi-i "DM-i inyakba mapaji tesempatsüka. Hao kibong jagi ozüing alema inyakogo saka sorkar ketdangsürtemi ozüing timi amshitsüla" ta ashi.

Manikya Court nung kiyimba benjung nung timtem agütsüba ama Yadav-i tatok meshi.

Tripura MLA pungui state chief secretary dang DM merenshitsu shiditem züluogo.

COVID-19 kanga putetba agi Tripura sorkari April 22 nungi Agartala municipal areas nung night curfew benok.

April 24 aonung Tripura nung kibong kati kiyimba benjung ayonga among aser iba atema DM Yadav-i mita aodang kiyimsang dak teka sangshi aser meinprong agütsü.

Sumila Ronghangpi tepseter nem tasüba temerenshi agütsütsü akhangar



Guwahati, April 29 (Agencies): Assam nung lisapur teloktem aser social activist temi arishi küm 12 tain Sumila Ronghangpi tepseterem tasüba agi merenshitsu takhangba agütsür.

Nagaon district kübok Raha nung Sumila dak tashiyim agi shi nung medemba sülen tepset aser All India Tribal Students' Students' Association Assam unit, Kundiyo Mission Society, Deori Peoples Justice Forum Assam unit aser tribal social & legal activist Raju Deuri nungertemi tasüba temerenshi agütsütsü akhangar.

Sumila ya West Karbi Anglong district kübok Kudam Ronghang Arong nungi liasü.

2018 küm lar tsüraburtemi Pares Borthakur'er kidang jala ka ama lia azüingtsü atema

yoka liasü.

Pares Borthakur ya Raha kübok Khaigor nung lir.

"Ajisüaka Sumila dak aiben teka sangshia aru aser lai lar tsürabur aser kinungertem den mejembidaksü" ta activist Raju Deuri-i ashi.

"Lar tsüraburtemi azüingtsü-zülutsü memetet aser oshi junga mashi. Yaküm nungi Sumila'er tsürabur aser tedi nungertemi Borthakur dang la yoktsü mepishi saka pai meyok" ta paisa metetdaksü.

"Sumila asüba anogo ka matongdang tedi Borthakur den phone ajanga jemi aser tenu kidangi yoktsü mepishia liasü" ta Deuri-isa ashi.

"April 22, 2021 nü Prakesh Borthakur aser pa jabaso Nayanivoti Borthakur'er kidang lendong atalok. La dak mi senoktsü. La ya mashisa liasü

aser la dak tashiyim mapa inyakba kuli samatsütsü atema la rongset" ta Deuri-isa shisem.

Iba lendong atalokba sülen Borthakur aser par kibongi Sumila la sasa asü ta ashi.

SC/ST (Prevention of Atrocity) Rules 1995 nung Arrla 6 nung shia aliba agi iba ama lendong atalokba osang angashili DC/SDO/Executive Magistrate / S P / D S P ketdangsürtemi tesem tonga oa bushisüngdangtsüla aser iba osangji state sorkar nem sangoktsütsüla ta activist Deuri-isa shisem.

Assam nung SC/ST (Prevention of Atrocity) Act 1989 aser SC/ST (Prevention of Atrocity) Rules 1995 alema mapa kanga inyaker. Act nung lateta aliba ama takoksa ajurur kibong nem teyari agütsütsüla, ta Deuri-i metetdaksü.

Arunachal aser Meghalaya nung arishi küm 18 temapur nem vaccine magütsütsü

Itanagar, April 29 (Agencies): May 1 nung India nung arishi küm 18 nungi 44 tsüingda alir nem COVID-19 vaccine agütsütsü sentong lir, saka Arunachal Pradesh aser Meghalaya nungbo magütsütsü ta osang metetdaksüogo.

Arunachal Pradesh-i COVID-19 vaccine ano mangu lir anungji vaccine magütsütetsü, ta tanü ashi.

Vaccine yanglurtemi Arunachal Pradesh Health Department nem ano osang magütsü. Anungji tang atema arishi küm 45 sser temapur nem dang vaccine agütsütsü, ta

osang ajanga ashi.

"Vaccine yanglur nungi osang kecha mali, anungji iba osangji atatsü" ta Arunachal Pradesh Health Minister Alo Libang-i metetdaksü.

Arunachal Pradesh Health Department-i Serum Institute of India dang Covishield vaccine lakh 4.5 order süogo. Ajisüaka, tang tashi sorkari parnok nungi osang kecha mangu lir.

Meghalaya sorkari May 1 nungi arishi küm 18 nungi 44 tsüingda alir nem COVID-19 vaccine magütsütetsü ta shiogo.

"Sorkari Serum Institute of

India, Pune dang COVID-19 vaccine order asü saka ano mangu lir. Tanga state temia kasa timtem ajurua lir. Anungji Meghalaya nung arishi küm 18 nungi 44 tsüingda alir nem vaccine magütsütetsü. Kodang nungi agütsütsüar jelia metetdaksütsü" ta Health & Family Welfare Department Principal Secretary, Sampath Kumar-i ashi.

"Ajisüaka, sentong renema aliba ama online registration tenzüktsü. Arishi küm 18 nungi 44 tsüingda alirtemi vaccine agütsü atema tenüing agütsütsü ayongzükter" ta paisa ashi.



Indian Army indang Eastern Command nung General officer commanding-in-Chief, Lt General Anil Chauhan-i Manipur semdangdang agiba noksa angur. Lt General Anil Chauhan-i anogo asemnü atema Assam, Nagaland aser Manipur state tem semdang aru aser iba mapang osang balala metetpalaa liasü. Paisa Nagaland aser Manipur nung Spear Corps aser Assam Rifles units aser formations semdangogo.



TIR YIMYIM YIMOBILEM (EDITORIAL)

DIMAPUR ROGONÜ, RONGCHII (APRIL) 30, 2021

Shiranger anepalu ashitsüla

Asenoki tashidak indang jembidang aser bilemdangdang, shiranger repringtsüba aser anepalutsüba mapa ya zünga shia meteter mozü kidang inyaker doctor aser nurse-tem mapa amai dang bilemer. Ibayongji, asenok aikati asenok komaser anema alitsü aser komaser asenok temang tera mejungi akümdanga asenoksasa asenok anepalutetsü ta asüba nüngdak indang mebilemdanger. Ajisüaka, asenok ajaki peisasa pei temang anepalubo ashitsüla aser kinungertem rongnunga kar shirang tenzükra, mozü kidangi maodang asenokia akok tashi anepalutetsüsa asenok dak temetetba shisatsü terabo alitsüla. Aji oda, yiruyipong dang, menen saklokdang, tebok aodang aser maodang aser manga yimra agi atongdang asenoki asenoksasa anepalutetba ajanga mapang aser senotsü meindoki taneptsü angutsü. Atangji, temang meshitaki akümdang jet ta doctor bushibaji junger, saka aika asoshi aji temela masü. Ano, talisa tang ama alima ajunga nung mopong nung bener jajaba tashidak wara agi nübortem amokmerendang, peisasa tashidak nungi jenbua alitsü merangba den külemi ano shirangba mapanga peisasa pei temang anepalutsü meteta alitsübaji kanga tongtibang kumogo. Tang ya Nagaland nunga anogo shia nisung noklang ta dak Covid-19 tashidak mesen aliba putetter. Atangji, parnok dakji Covid tashidak putetaka parnok teimbaka teshirangbo meshiranger, anungji Covid mozü kidangbo mayur saka pei kidang kinungertem den memeyoktepi takdang balaka nung peisasa anepalutsü asoshi yoker, kechiyong tashidak putetter ajak ayutsüsa mozü kidang yipten maka aser anepalurtema mali. Anungji pei kidang peisasa anepalutsü yokbaji junger saka idakji lendong tuluka keta lir, kechiyong peisasa anepalutsü memetetra aser mekümdangra mapang tatsüka tsüngdang nung kinunger ajak dak kasa tashidak mesenji menaloktsütsü aser kinungertem jagi kidang kiyonger aser medemertem dak menaloktsütsü ta khen nung alima ayimsünga aotsü aser ajakji ka khen, ka khen ta shirang tenzüktsü. Idangjibo, yunüyonga meyunüyonga aser mozü kidang yipten aliyonga maliyonga, shiranger ajak mozü ki bushitsüsa akümtsü. Aji oda, asen lima nung district ajak nung anogo shia nisung meyerijang ta masüyonga nisung noklang kaka mozü kidang anepalutsüsa kodamasü shirangadokra, asenok asoshi iba ama alima tensa mapangji komaka asütsü ta tang yongi asenok tulur tilar ajaki shisabolua bilemtsüla. Iba tensaji nokdangtsü asoshi government kija dak imlar lira, government nung alir malir ajak külemi remoka samatsüsa tetsübuttsü anogo yakta asenoki ajurutsü. Iba jagi tashidak agi matongdang teti sü agi tenitebang nembanger senzütsü, teti sapon agi teka metsüktsü, teka memetsük ser teni tebang nung mekongshitsü aser pi anasai maotsü indang tetuyuba agütsür. Item teinyaktsütem denji bendenloka asenoki asenoksasa anema alitsü asoshi akok tashi tzü temekong majemtsü aser chiyongtsü temekong machitsü, süngjanglijang meshitoki machitsü, yimdong aser mapa nungi aruli süoshi melener tzü chigutsü, süoshi melenzükbaji tangar süoshi den memeyoktepi jungjunga shitoktsü, akok tashi tzü talem jembet ajemtsü, tebok tazüng metoktsütsü aser poknüngbokra timtemtsüsa achi ajem kecha masütsü aser yimra manga agi tonga terok shia tekolak menüra mozü kidangisa maoyonga mozü shitettertem dang asüngdanga mozü achitsü ta peisasa pei temang anepalutetra aser asenoki asen kinungertema anepalutetra, iba jagi meteta aser memeteti asen dena nisung aika tasüba lendong ajurutsüba nungi kümzüktsü. Alima tongpang rara tulu atalokdang senso ajak sepai kümer tongpang nung nokdakba amato, tang ama tashidak tongpang nung yaa senso ajak doctor aser nurse ama peisasa pei temangbosa anepalutetsüsa shia meteta melira, mozü kidang inyaker doctor aser nurse kija agibo meperitsü aser tongpang ya makoktsü. Iba ama tensaji matalokia ataloktsü ama bilema, senso shiai pei temang anepalu ashitsüla aser peisasa tashidak wara nungi jenbua alitsü merangba mapa ya asen taküm kisung masü saka asen kinunger, asen kiyonger aser asen nübortem taküm kümzüktsü asoshi bilema inyaker amato kanga süoki ia inyaksüla. Joko, asenok ajak tongpang nung nokdaka lir, anungji prangpong amshibosa ashitsüla ta asüba amato, meshirangtsü merangba den ano shirangertema anepalu ashitsü kanga nüngdak kumogo.

OLEMSABANG

Nabot lung agi onseta südaktsüba ama Delhi nung aluyimeri ajurur

~ Wati Longchar, Serampore

(Yashi adok nungi...)

Saka tanü Nabot ama aluyimertemi industrialist/cooperate anema aser Government dang ashiba ola mamatsüla:

- o Ali kümzüka ayutsüla. Alii meimchir aser taküm ajak mesür.
- o Nai ali yokra, senji küm ishika nung agimadoktsü, saka ali kümzüka yura küm 5000 tema mesütsü.
- o Tsüngküm balala nung alii chiyungtsü adoktsütsü. Sen den ali, tzü, ayong, arem medemdangtsü makok.
- o Ali ayokba, samaba den kin ayak samar, alar akümer.
- o Governmenti gari factory, five star hotels, golf club, shopping malls, ibala mesüka terenlok indang jembir. Itemji sensaker, aluyimer atema masü; takar asoshi dang. Sensaker ajangzüktsüsa terenlok mapa inyaksüla.
- o Govt. aser cooperate-temi industry lapokra, ner chir mapa angutsü. Kobala mapa? Mapa tila-teri aser lendong aketba mapa inyaksü agütsütsü. Nisung ishika mapa tajung ngutetsü akok, saka yimtaklir ajak nembo magütsütetsü. Ali yokra, aluyimertem mapa maka akümtsü.
- o Nübortem shirnoki ali ayok parnok kong alitsü. Tanga lima nung refuge akümtsü.
- o Yimtsüngtem nung light junga agütsü nung, aser lenmang junga yanglutsü nungbo cooperate nungdak mali, nübortemi parnok saka industry lapoktetsü, tat. agi, ola-angla mapa balala. Lenmang junga ali nungbo chiyungtsü balala züsentetba yoktetsü aser ibajajanga kibong mesütsü akok. Tangalen nungi bener aruba industry jagi aluyimertem tejakleni moudaktsütsü.

Süra terenlok mapatemji kechi? Item yaa terenlok mapa nung tongtibang ta metetdi:

- o Nübortem tangar shiang lar mükümi pei peri chiyungtsü ngutetsüsa maparen balala inyakteta aoba dang terenlok ta ajar.
- o Shirangdang yimtem (Guwahati, Kolkata, Delhi, a.a) bushia maotsüsa mozü ki, medical collegepei lima yanglutetba dangji terenlok mapa ta ajar.
- o Tzütai maotsüsa, aser tzüngküm mapang tzü-i merakteptsüsa, aser tzü alia majemtsüsa, kibong shia nung tajemtsü anogo piyong agütsüba dang terenlok mapa ta ajar.
- o Yimtsüng nung tanurtem shisalok riju junga ayuba dangji terenlok mapa ta ajar.
- o Alu yimtsü asoshi tzümesü lenmang peria yanglutsüba (irrigation) dang terenlok mapa ta ajar.
- o Yim o yim na tesendaktep lenmang, yimtsüng o jila tesendaktep lenmang tajung yanglutetba dang terenlok ta ajar.

BigBoss terenlok asoshi masü, item terenlokji Governmenti tama inyaksüla. BigBoss-i azüoka ayuba Government masü, BigBoss azüoka yutetba Government nungdak.

Terenlok mapa tulu balala nungdaker, saka cooperate-i ajangzüktsü mapadong masü, nübortem tiptema alitsü asoshi ozüng balala yanglua nübura azüoka ayutsü nungdaker, saka takar tsütsü atsünga yanglubaji tai. Yosef-i ayawara mapang nübortem ket nungi sen, parnok ket nung aliba oset-tsüset, kiset shiruru aser ali ajak rakzüker Farao meyong kümdaktsüba aser nübortem alar tiai yokba ama (Lip. 47 zügang), Covid-19 wara PM Modi anir aluyimertem anema inyakba angur. Noklang nung nisung kanati ali rongsen ajak bendenadoktsüsa rongsen ketzüng yayim ya ochimashi mapa ta metetsüla. Tanü alima meimchir rongnung maka mait, taya ajurudaktsüba ya takar ishikati dang rongsen ajak bendenadokba ajanga lir ta metetsüdi. Ochimashi anema Elija ama noktaksü metsübuli. Lungjemdi aser ochi ola adokdi.

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Nagaland Bible College pur 'graduation service' takok ngua kaogo (Laishir 33-i degree balala renemogo)



Nagaland Bible College 39th & 40th 'graduation service' sentong April 29 nü takok ngua agir külen, takok angur kaketshirtem den Tsungrem osang abener missionary Dr. Imcha Jamir, college nung ketdangsür aser tesayurtem külemi tangokba noksa nung angur. Mokokchung, April 29, 2021.

Mokokchung, April 29 (TYO): Mokokchung town nung aliba Nagaland Bible College (NBC) pur 39th aser 40th graduation service sentong parnok college campus Discovery Hall nung takok ngua kaogo. Yaküm Covid-19 wara ajanga alima ajunga shibangba agi iba sentong magiteti arur taküm ang küm ana batch reptepa agi.

Bachelor degree den masters degree balala nung taküm 2021 küm parnok metsü (20) aser yaküm 2020 batch nung parnok 13 ta ajak senteper 33 graduate süogo. Nagaland Bible College, Principal Dr. Sentila Ao ajanga degree balala nung takok angur kaketshir nem kuli kakets agütsü.

Iba sentong nung Nagaland Higher & Technical Education,

Tribal Affairs Minister, Temjen Imna Along-a shilem agütsü jaok saka koda masü tsükdakrang maparen kar adoka medentet, saka pai salem o tajung tezüluba nung bener yokba tesayur kati telok dang zünga metetdaksü.


Sentong nung Tsüngrem osang abener Nagaland Christian Revival Church (NCRC) Missionary at Large, Dr. Imcha Jamir-i takok angur kaketshirtem dang Joseph-i Tsüngrem dak tamang yur bendanga agütsüba aser tila küma ajemalu ajanga timtem balala koktetba ama, Tsüngremer wadang balala nung noktakang, nenok dak Tsüngremi mapa inyakba jungkai adokba meteta tenzüksü asoshi tayongzüka agütsü.

Wadang balala inyakdang timtem toushi aser reshikangshi

jenti ajurutsü, aji saka, nenoki itemji shisa kaa langzütetsüsa aser Tsüngremi shimer yokba nübu ka ama tajungtiba agi tenzüksü, paisa kaketshirtem ajungshia liasü.

Nagaland Bible College (NBC) ya Asia Theological Association (ATA) nung züngokba college ka lir. NBC ya Mokokchung Town kübok Artang Ward nung amenoka lir. Iba college nung certificate of theology, diploma of ministry, bachelor of ministry (B. Min.), master of ministry, master of divinity (M. Div.), diploma of theology, bachelor of theology (B. Th.) course-tem agütsür. Iba riju nung züngnürtemi iba number +919436607340, Email: nbc mokokchung@gmail.com mesüra iba website:iicsmokokchung.com/nbc nung tongtepretepsü akok.

Clark Theological College nung Principal tasen agizükba sentong agi



Aolijen (Mokokchung), April 29, 2021: April 27, 2021 nü Clark Theological College nung Principal tasen agizükba sentong nung ABAM Executive Secretary, Rev. Dr. Mar Pongener aser CTC nung Principal tasenba, Rev. Dr. A. Temjen Jamir na tangokba noksa nung angur.

Mokokchung, April 29 (TYO): April 27, 2021 nü Multi-Purpose Hall, CTC Aolijen nung Clark Theological College nung Principal tasenba, Rev. Dr. A. Temjen Jamir agizükba sentong agiogo.

ABAM Executive Secretary, Rev. Dr. Mar Pongener-i ketdangsüa principal tasenba agizük aser paisa meshiteta sarasademja liasü.

Iba sentong nung Chairman-i anir CTC Board of Governors, anasa aliba Arogotem nungi pastor tem, temeimertem aser CTC nung inyakertem/azüngertem aden.

Iba sentong nung o tatsüka

jembidang Principal tasenba, Rev. Dr. A. Temjen Jamir-i CTC nung Principal inyaksü atema Ao Baptist Arogo Mungdang, CTC Board of Governors aser Clark Community-i pa dak tamang kateta pa nem iba khuret nungloksüba atema ajak dang pelar, ta metetdaksü.

Tsüngrem teyari meshiba den külemi Principal-i, Tsüngrem tenzüka wadang nung nokdaksüpur lanurtem nem training agütsüba wadang nung ajaki longjemer amalitepa inyaksü imlar, ta ashi.

Kasa sentong nung CTC Board of Governors Chairman, Dr. Sunep Imchen, CTCSU Tir,

Geihwang Konyak aser Changtongya Town Baptist Arogo nung pastor, Rev. Temshi nungeria o tatsütsü jembia liasü.

Iba sentong ya Dr. Nungshi Tzüdir leniba nung agi.

Dr. Temjen Jamir ya Akhoya nung aser Changtongya Town Baptist Arogo nung züngsem ka lir. Pa 1994 küm mezüng Clark Theological College nung Department of Communication nung lecturer inyakba liasü. Iba jakdang pa Kohima Ao Baptist Arogo nunga 1987 nungi 1990 küm tashi Associate Pastor (Youth) inyakba liasü.

Dr. Temjen-i Clark Theological College nung tamalen Dean of Practical Ministry, Dean of Post Graduate Studies aser Academic Dean inyakba sülen tang tesüsa CTC nung Principal 5bubaji pa asütsü.

Pai tamalen Popularisation of Folk Music in Christian Worship (2001/2018) kakets aser Folk Dance as Ecumenical Communication: A Theological Vision and Mission (2020) kakets zülua liasü. Paisa academic journal aika atema otsüno aser ocet balala zülua aruogo.

CTC nung inyakertem aser azüngertem Principal tasenba dak teimla tulu akar iba denji külemi pai khuret tasenba agizükdang Tsüngremi pa tali moajang ta sarasademtsür, ta CTC official sandong ka ajanga metetdaksü.

ANO GO ABEN TSÜNGREM DEN

Meimtsü Angazükba

1 TESA. 3:12; 4:9

Tsüngrem temeim lir (1 Yn. 4:16). Pa yimyaji tabensa temeim, saka temenen yong temeimji teti sadema aser yimya ama Pa chirtem dangi marur. Na temeim mesayuba kibong ka nung iner alitsü akok. Nai meima aliba kari na yirutsür alitsü akok. Na kümzüksü asoshi ne mulungjang meranga kümer alitsü akok. Nai kar meima alitsü akok, saka o nung aser mapa nung koda ne temeim sayutsü nai memeteti alitsü akok. Nai jashia bilemstü akok kechiaser meimtsü asoshi Tsüngremi na aja, saka tangar dang koda meimtsü nai mangatet.

Ao Theological Association-i Sandonger

ATA Sanen Luden Meeting (27/04/2021, ABAM Farm, Tuli) nung tongtibang telemtetba ka agiba yamai lemsateper: ATA 32 Buba Kumsem Inti Mungdang Sentong (21-23/Monupii/2021, Longkhum Baptist Arogo) Covid-19 Wara tebilemstü agi Thinena atar. Kasa Sentong tensa aser mapang apir agütsü züngsem ajak nem metetdaksür.

Sd/-
Chubatemjen.
Senyur.

Sd/-
T Lima Lkr.
Tir

Ao Baptist Arogo Mungdang (ABAM)

IMPUR-798 615, MOKOKCHUNG, NAGALAND: INDIA

E-mail: abamimpur7@yahoo.co.in

Website: www.abamimpur.org

☎ : 0369-2262202 (O)

Dated Impur the 29th April 2021

SARASADEMSTÜ AYONGER

Oh Kibuba, kü Tsüngrem, teyari asoshi ni ne dang ayimten, aser nai ni anebtsüogo. (T. Ken 30:2)

Ao Baptist Arogo ajak dangi Pastor ajanga


Temeim amangbapurtem,

Tamasa ABAM ajanga Yisu Khrista temeim salem abener.

COVID-19 wara poktetba ajanga meimchirtem dangi tetsüba aser takoksa aika bener arutsüogo. Iba wara kokteteter ama süngjema akümba mapang ka nung anisungzük aser tepela tulu ajangashia aruogo. Saka taoksatsüka COVID Strain 2 ajanga asenok süngjema melitetsüsa kümdaksüba tensa kati aitogo. Tsüngrem dak imlatsü (T. Ken 39:7) dak alaka tanga lenmang kecha monguteter. Anungji arogotem ajak nung **May 2 (Deobar)** tekülem sentep agidang Pastori achaayanga mapang agiteter lokti sarasadem ayonga agütsü mepishir. Item onüktem asoshi sarasademdi;

1. Asen tashi maitbatem aser aibelenbatem asoshi tatok meshia sarasademdi (T. Ken 32:5).
2. Mongintem COVID Strain 2 yagi India lima kanga mejungi atongtsü ta ashiba ama ibai asenoki asangsang nung ajurua arudagi. India nung anogoshia iba wara yagi nisungtem aika südaki. Tasürtem aremstü ali peria maka aser tasü mang arongtsü tesem makaba tia ka nung lir. Tsüngrem dang iba wara meshi meshia samajang ta sarasademdi.
3. COVID Strain 2 yagi talisa tanurtem dak kanga mejungi kongshir. Anungji Tsüngremi asen nem moatsüba tanurtem iba wara nungi kümzüka yujang ta sarasademdi.
4. Mozü shiteterem nem Tsüngremi shisatsü agüja iba wara koktetsü tapet mozü tekaraba nung nguteta yanglutetsü asoshi sarasademdi.
5. Iba wara ajanga kibong aika nung tasüba ajurua mangyim tia nung lir. Item kibongtem asoshi Tsüngremer tesunepsüba meshia sarasademdi.
6. Lendong aser timtem ka ajanga meimchirtemi Tsüngremer tashi tali angateta akümer. Iba wara ajanga timtemdaksüba mapang ya Tsüngrem ain aser tashi tali tejangjaba metetsü mapang ka südakjang ta sarasademdi.

Amanga sarasademba agi nenoki kechisa meshidir ajak nenoki angutsü (Mathi 21:22)


Rev. Dr. Mar Pongener

Executive Secretary
Ao Baptist Arogo Mungdang


Dr. I. Lolen Imchen

President
Ao Baptist Arogo Mungdang

OLONG PAITEP # 5797

	1		2		3			4		
	5									
							6			7
			8		9					
10		11		12						
									13	
				14	15		16			
17										
					18					
19										

- | | | | |
|----------------------------|-------|-------------------------------|-------|
| TIPILEN | | LANGTSÜNGLEN | |
| 3. Tzünglu arudang amshiba | - (6) | 1. Pei tebu dang yamai-a ajar | - (5) |
| 5. Temulung nung shisadang | - (5) | 2. Nüchi mangurtem | - (4) |
| 6. Shirangba ajung | - (4) | 3. Teka agi sot | - (4) |
| 8. Mangmanga bilem | - (4) | 4. Adenshi | - (6) |
| 11. Obang mapui toktep | - (7) | 7. Pakshi | - (4) |
| 14. Maka/Mali | - (4) | 9. Tsüngsak _ _ _ | - (3) |
| 17. Senshi | - (4) | 10. _ _ _ _ lok | - (4) |
| 18. Yabo amentaka meyteter | - (5) | 11. Teimba aküm | - (6) |
| 19. Saku/kasa | - (6) | 12. Tasen Lai kaket ka | - (3) |
| | | 13. Nisung dak aliba shiruru | - (5) |
| | | 15. Pongdang nung _ _ _ _ | - (4) |
| | | 16. Mapangshia | - (4) |

OLONG PAITEP # 5796 TELANGZÜBA

- | | | | |
|---|--|---|--|
| TIPILEN : | | LANGTSÜNGLEN : | |
| 1. Kasa, 6. Rangben, 7. Mait, | | 1. Khu, 2. Süjak, 3. Onük, 4. Oba, | |
| 9. Poktet, 11. Ati, 13. Atasa, 16. Rür, | | 5. Anü, 6. Ratet, 7. Mozü, 8. Ita, 10. Tar, | |
| 17. Rajang, 20. Lanu, 24. Nüngjem, | | 12. Tinu, 14. Salem, 15. Aja, 18. Anünü, | |
| 25. Süra. | | 19. Taju, 21. Ano, 22. Onü, 23. Kua. | |



Tulur kibong kati sen aika entoka Missionary yoker

Alokba : Tulur...Tan deobar-nu neri Arunachal - Nepal -Myanmar - China lima nung sen merijang aika entoka missionary yokba.... atema Pastor-bai tenungsang agutsür...arogopur ajaki teka maloktsüogo.
Saka aji tang masü...ano ner kidang alir kilir nem-a...Uummnn... Uuumnnn...Uuummn... Uuumnnn...!!!!!!!

Tulur : Hai Alok.... Na kechi Uuumnn...??? Uuumn tetezüji kechi...???

Alokba : Ayyee...Sen aika endoka alima talangi missionary aika yok yongjia ner kidang kilir nem-bo azi-ak den kasa... chiyungtsü tashih/tanüing chitaktsüba... süoshi tejen teshisa-tapok-tara semdaksüba... Kiyong kidanger den jungtepa malir...sensaker/timtemer dangbo memeimer.
Saka konang- nungsang angutsü atema alima talangi missionary aika yokbaji kechi tajanzük... tamasa ner atepzüng nung temeim mapa inyangangma.

Lilir : L. Kika Pongener

TANÜBO NAI LANGZÜANG

Q. EU Critical Maritime Route Wider Indian Ocean (CRIMARIO) kodang amenok ?
A. 2010 B. 2012 C. 2015 D. 2018
_____ (Taruba adok nung onoki langzüsü)
YASHI ADOK TELANGZÜBA : 1998

AO OSHI ANGAZÜKDAK:

TANÜ ANGAZÜKTSÜBA OJANG



Tir Yimym

Taro

(adj) Süng takong (dried wood)
* Süng taro nung mi melamelaa kaor.

Chijem

(v) Komobang ajurutepa anepba (cure of wound)
* Asükwa nung komobang kanga melaa chijem.

NAI-A YA METETTER MA?

India nung 2021 küm mezüngbuba quarter nung timtiba ayonga gari ter:



- | | |
|------------------------------|------------------------------|
| Maruti Suzuki Alto: 18,260 | Maruti Suzuki Swift: 17,180 |
| Maruti Suzuki WagonR: 17,165 | Maruti Suzuki Baleno: 16,648 |
| Maruti Suzuki Dzire: 15,125 | Hyundai Creta: 12,284 |
| Hyundai Venue: 11,779 | Maruti Suzuki Eeco: 11,680 |
| Hyundai Nios: 10,865 | Maruti Vitara Brezza: 10,623 |

SUDOKU # 5840

		8			9	2	8	5	7	1	3	9	4	2	6			
		9	1	3		4	6	1	2	6	5	8	4	3	9	7		
2	4		6	8	1			9	4	3	7	2	6	1	5	8		
5	3		8				9	2	7	9	3	6	5	8	1	4		
9		2	5		3	6	1		4	6	5	8	7	1	2	3	9	
		1	4	2			3	5	7	3	1	8	9	4	2	7	6	5
			5	9	2			6		5	9	2	4	1	7	6	8	3
								9	4	7	3	1	6	9	8	5	4	2
4		1	7					8	3	6	8	4	2	5	3	9	7	1

TELANGZÜBA # 5841

OJANG LUTEP # 5383

- | | | | | | | | | | | | | | | | | | | | |
|--------------|---|--------------------------|--------------------------|--------------------------|--------------------------|--------------------------|--------------------------|--------------------------|--------------------------|--------------------------|--------------------------|--------------------------|--------------------------|--------------------------|--------------------------|--------------------------|--------------------------|--------------------------|--------------------------|
| GATETTANEP | : | <input type="checkbox"/> | <input type="checkbox"/> | <input type="checkbox"/> | <input type="checkbox"/> | <input type="checkbox"/> | <input type="checkbox"/> | <input type="checkbox"/> | <input type="checkbox"/> | <input type="checkbox"/> | <input type="checkbox"/> | <input type="checkbox"/> | <input type="checkbox"/> | <input type="checkbox"/> | <input type="checkbox"/> | <input type="checkbox"/> | <input type="checkbox"/> | <input type="checkbox"/> | <input type="checkbox"/> |
| MTETEMEIP | : | <input type="checkbox"/> | <input type="checkbox"/> | <input type="checkbox"/> | <input type="checkbox"/> | <input type="checkbox"/> | <input type="checkbox"/> | <input type="checkbox"/> | <input type="checkbox"/> | <input type="checkbox"/> | <input type="checkbox"/> | <input type="checkbox"/> | <input type="checkbox"/> | <input type="checkbox"/> | <input type="checkbox"/> | <input type="checkbox"/> | <input type="checkbox"/> | <input type="checkbox"/> | <input type="checkbox"/> |
| TNGNEPEEJUT | : | <input type="checkbox"/> | <input type="checkbox"/> | <input type="checkbox"/> | <input type="checkbox"/> | <input type="checkbox"/> | <input type="checkbox"/> | <input type="checkbox"/> | <input type="checkbox"/> | <input type="checkbox"/> | <input type="checkbox"/> | <input type="checkbox"/> | <input type="checkbox"/> | <input type="checkbox"/> | <input type="checkbox"/> | <input type="checkbox"/> | <input type="checkbox"/> | <input type="checkbox"/> | <input type="checkbox"/> |
| TRITEPEYA | : | <input type="checkbox"/> | <input type="checkbox"/> | <input type="checkbox"/> | <input type="checkbox"/> | <input type="checkbox"/> | <input type="checkbox"/> | <input type="checkbox"/> | <input type="checkbox"/> | <input type="checkbox"/> | <input type="checkbox"/> | <input type="checkbox"/> | <input type="checkbox"/> | <input type="checkbox"/> | <input type="checkbox"/> | <input type="checkbox"/> | <input type="checkbox"/> | <input type="checkbox"/> | <input type="checkbox"/> |
| TEAKTESENDP | : | <input type="checkbox"/> | <input type="checkbox"/> | <input type="checkbox"/> | <input type="checkbox"/> | <input type="checkbox"/> | <input type="checkbox"/> | <input type="checkbox"/> | <input type="checkbox"/> | <input type="checkbox"/> | <input type="checkbox"/> | <input type="checkbox"/> | <input type="checkbox"/> | <input type="checkbox"/> | <input type="checkbox"/> | <input type="checkbox"/> | <input type="checkbox"/> | <input type="checkbox"/> | <input type="checkbox"/> |
| TOEPRATNGTEP | : | <input type="checkbox"/> | <input type="checkbox"/> | <input type="checkbox"/> | <input type="checkbox"/> | <input type="checkbox"/> | <input type="checkbox"/> | <input type="checkbox"/> | <input type="checkbox"/> | <input type="checkbox"/> | <input type="checkbox"/> | <input type="checkbox"/> | <input type="checkbox"/> | <input type="checkbox"/> | <input type="checkbox"/> | <input type="checkbox"/> | <input type="checkbox"/> | <input type="checkbox"/> | <input type="checkbox"/> |
| TALETEPEP | : | <input type="checkbox"/> | <input type="checkbox"/> | <input type="checkbox"/> | <input type="checkbox"/> | <input type="checkbox"/> | <input type="checkbox"/> | <input type="checkbox"/> | <input type="checkbox"/> | <input type="checkbox"/> | <input type="checkbox"/> | <input type="checkbox"/> | <input type="checkbox"/> | <input type="checkbox"/> | <input type="checkbox"/> | <input type="checkbox"/> | <input type="checkbox"/> | <input type="checkbox"/> | <input type="checkbox"/> |
| THITEJASEP | : | <input type="checkbox"/> | <input type="checkbox"/> | <input type="checkbox"/> | <input type="checkbox"/> | <input type="checkbox"/> | <input type="checkbox"/> | <input type="checkbox"/> | <input type="checkbox"/> | <input type="checkbox"/> | <input type="checkbox"/> | <input type="checkbox"/> | <input type="checkbox"/> | <input type="checkbox"/> | <input type="checkbox"/> | <input type="checkbox"/> | <input type="checkbox"/> | <input type="checkbox"/> | <input type="checkbox"/> |
| MUNGTEJEP | : | <input type="checkbox"/> | <input type="checkbox"/> | <input type="checkbox"/> | <input type="checkbox"/> | <input type="checkbox"/> | <input type="checkbox"/> | <input type="checkbox"/> | <input type="checkbox"/> | <input type="checkbox"/> | <input type="checkbox"/> | <input type="checkbox"/> | <input type="checkbox"/> | <input type="checkbox"/> | <input type="checkbox"/> | <input type="checkbox"/> | <input type="checkbox"/> | <input type="checkbox"/> | <input type="checkbox"/> |
| JEPTMEEP | : | <input type="checkbox"/> | <input type="checkbox"/> | <input type="checkbox"/> | <input type="checkbox"/> | <input type="checkbox"/> | <input type="checkbox"/> | <input type="checkbox"/> | <input type="checkbox"/> | <input type="checkbox"/> | <input type="checkbox"/> | <input type="checkbox"/> | <input type="checkbox"/> | <input type="checkbox"/> | <input type="checkbox"/> | <input type="checkbox"/> | <input type="checkbox"/> | <input type="checkbox"/> | <input type="checkbox"/> |

OJANG LUTEP TELANGZÜBA # 5382

KENÜYONGI BILEMBA AJAKBO MAKOKTSÜ MAPA KARBO MAPANG AGIANG TAKOK ANGUR

TAN HOPTA ATEMA - KOMA SÜLA ?

Q. Covid-19 tashidak wara agi senzüsenpong aser lokti senden senteptsü mesademi akümba mapang ya arogo ajak nung aonung shia online Bible Study (Lai bushiba mapang) sentong ka tenzük nunga koma süla ?

West Bengal nung Mamata-i aniba TMC-i takok angutsü: Exit polls



April 29, 2021 nü West Bengal nung assembly election tembangba anogo nung Malda District nung aliba polling station ka nung voter ka dak thermal screening agiba noksa nung angur.

New Delhi, April 29 (Agencies): Brihostibarnü West Bengal nung assembly election tembangba sülen aonung 7:00 ako nungi tenzüka West Bengal, Tamil Nadu, Kerala aser Assam state tem nung Assembly elections Exit Polls osang sangdongogo.

ABP-C-Voter exit poll survey ajanga West Bengal nung Mamata Banerjee-i aniba Trinamool Congress-i state nung aliba assembly menden 294 nungi menden 152-64 tashi nung takok angutsü aser tang agi tasembenbuba sorkar

akümtsü, ta asadangtetogo.

Tawa West Bengal nung dang masü saka Tamil Nadu, Kerala, Assam aser UT Puducherry nunga assembly elections agia liasü, ajisüaka West Bengal nung election tesashiba agiogo.

Bengal nung ruling Trinamool Congress aser BJP na tsünga menden aika nung kanga atongtepa toktep aser menden kar nungbo CPI (M)-Congress-ISF teloktep jenjang kanga junga liasü.

West Bengal election indang exit polls balala yamai liasü:

ETG Research: TMC-i menden 164-176 angutsü, BJP-i menden 105-115 aser Congress-Left alliance-i menden 10-15 angutsü.

P-MARQ: TMC: 152-172, BJP-112-132 aser Congress-Left alliance-10-20

ABP C-Voter: TMC: 152-164, BJP: 109-121 aser Congress-Left alliance: 14-25

CNN News18: TMC-162, BJP-115 aser Congress-Left alliance-15

Republic TV-CNX: TMC-128-138, BJP-138-148 aser Congress-Left alliance-i menden 11-21 angutsü.

Bengaluru nung coronavirus agi shiranger 3,000 dak tema sama

Bengaluru, April 29 (Agencies): Tang linüki coronavirus wara anema tongbang tulu raraba mapang ka nung ano tebilemsü khuret tali bendenlokja Bengaluru nungbo coronavirus tashidak agi shiranger 3,000 dak tema samaogo, aser parnok aikati phone switch-off süogo, ta Brihostibarnü Karnataka Revenue Minister, R Ashoka-i metetdaksü.

Karnataka State sorkari police dang tekaraba nung parnok ajak bushitsüla ta tuyuogo, ta minister-isa metetdaksü.

Tesüiba anogo ishika tsünga Karnataka nung iba tashidak agi shiranger timba-timba putetba mapang nung tang samaba nisungtem jagi iba tashidak kanga proktsü, ta pai ashi.

Bodhbarnü Karnataka nung nisung 39,047 dak iba tashidak puteta liasü aser iba nungjagi Bengaluru yimti kija nung putetba 22,596 densema lir.

State Health Minister, Dr K Sudhakar-i, iba ya tang mezüng ataloker masü, saka taoba küm nungi iba tashidak agi shirangertem samar, ta ashi.

"Onoki nüburtem nem mozü angati agütsür, aser ibaji ajanga case shilem 90 shi azüoker, ajisüaka parnoki (coronavirus agi shirangertem) phone-a switch-off süogo," ta Health Minister-isa metetdaksü.

Osangbenertem den jembidang Revenue Minister, Ashoka-i, "Parnok kanga mejungi shiranga hospital-i arua ICU yipten bushia liasü, ajisüaka

tangbo kechi ataloker?" ta ashi.

Parnok timbakati phone switch off süogo aser parnoki miimshia parnok kong aliar memetdaksür, ibayongji onok nem khuret tali agütsür, ta pai ashi.

"Bengaluru nung parnok 2,000 nungi 3,000-i phone switch off asüba sülen pei ki toktsür ogo. Parnok kong aliar onoki mejangja," ta paisa ashi.

"Iba amai inyakba agi tashidak ano tali proktsü, anungji ni parnok dang arutsü mepishir. Kanga menor ang ICU bushibaji tim masü," ta minister-i ashi.

Tang state nung aliba hospital balala nung nisung 2,192 tashi Intensive Care Units (ICU) nung mongdar, ta Minister-isa shisem.



April 29, 2021 nü Ranchi (Jharkhand) nung tasümgang rongdokba tesem ka nung coronavirus tashidak agi shiranga asürtem tasümgang rongdoktsü lia tangokba noksa nung angur.

India nung Covid prokba atema International media-i Modi aitsür

New Delhi, April 29 (Agencies): International osangkaket balala mezüngbuba tapak nung India nung coronavirus tashidak agi shiranga asürtem tasümgang rongdokba noksatem aser iba tashidak agi shirangertem oxygen maliba agi kanga timtema asüba noksatem adoker, aser ibaji ajanga India sorkar tenümg kanga menükdar.

Iba dak alia osangkaket balala nung yimobilem aser ocet balala ajanga India nung coronavirus tashidak kanga prokba aser iba tashidak agi nisung jenti asüba atema Ato kilonser, Narendra Modi aser pai aniba sorkar nem tai tongloktsür.

Yimobilem aser ocet balala ajanga ashiba agi, Modi-i aniba sorkari iba tensa paidokteter lila, ajisüaka sorkari Hindu nunger Kumbh Mela agitsü mela aser state/UTs nung assembly election agitsü temelaba agütsüba agi iba wara kanga prok, ta aitsür.

US nung adokba Time magazine nunga India nunger journalist, Rana Ayyub-i, "How Modi Failed Us" ta ser ocet ka züluba Brihostibar adok nung adokogo.

Lai züluba ocet nungji yamai shia lir, tekümdangtsü balala

ajak Ato kilonser Modi-i aniba sorkari paidok, anungji India nung iba wara tanaben prokba azioktsü atema junga renema malibaji sorkar tai ajanga lir.

Laisa, Modi-i kanga menor ang Kumbh Mela amongertem dang tekümdangtsü metetdaksü, iba denji külemi coronavirus agi shiranger meyrjang aikati medical teyari meshiba mapang nung ozü home minister (Amit Shah) aser Ato kilonser nati ibaji sendoka yutsür election nüboyim sentong nung ang shilem agi, ta aitsü.

Anogo ishika tejaklen 'The Times' osangkaket nunga West Bengal election nüboyim sentong ka nung mask magii Modi-i, "Tesem ajaklen ni lokti tulu angur. Ni election sentong nung yamai lokti tulu kodanga mengudang," ta jembiba atema aija liasü.

New York Times osangkaket nunga, "India nung hospital tem nung yipten peria maliba, oxygen aser vaccines peria maliba mapang sorkar aitsürtem timba kümard," ta metetdaksü.

Osangkaket aika nung, Modi-i covid wara anema raraba agi temelung sür liasü, ajisüaka tang tanaben iba wara prokba ajanga Modi-i tamakok anguba alimai jangjaogo, ta metetdaksü.



April 29, 2021 nü Ghaziabad nung Sikh nunger tekülem ki-Indirapuram Gurudwara nung coronavirus tashidak agi shirangertem oxygen agiba noksa nung angur.

India nung ano nisung lakh 3.79 dak Covid putet aser 3,645 asü

New Delhi, April 29 (Agencies): Tesüiba ghonda 24 tsünga India nung ano nisung lakh 3.79 tema dak coronavirus putet aser iba tashidak agi nisung 3,600 dak tema süogo; tang tashi nung India nung nisung million 18 tema dak iba tashidak putetogo aser nisung lakh 2 dak tema süogo, ta Brihostibarnü Union health ministry data ajanga metetdaksü.

Tesüiba anogo ka tsünga India nung nisung 3,79,257 dak coronavirus putet aser tang iba tashidak agi teshirangdakpur lakh 30 dak tema kümogo.

Tesüiba ghonda 24 tsünga iba tashidak agi nisung 3,645 asüba densemabo linük nung iba tashidak agi nisung ajak agi

2,04,832 süogo, ta Brihostibarnep 8:00 ako nung Union Health Ministry-i metetdaksü.

Tang tashi nung iba tashidak agi shiranger ajak agi 1, 50, 86,878 anepogo aser iba tashidak agi shiranger asüba shilembo 1.11 dang kümogo.

Taküm January 16 nungi tenzüka India nung coronavirus vaccine agütsüdar aser tang tashi nung nisung crore 15 dak tema nem vaccine agütsüogo.

Brihostibarnep Indian Council for Medical Research (ICMR)-i ashiba agi, April 28, 2021 tashi nung samples ajak agi 28,44,71,979 tendangogo aser iba nungji Bodhbarnü samples 17,68,190 tendangba densema lir.

Nepal nung anogo 15 lockdown tenzüker



Kathmandu, Nepal nung lockdown benoktsü anogo ka lia Nepal nungertemi pei yimtsüngi meyipa aotsü atema bus ketdangsür ka den ticket atema jembiba mapang tangokba noksa nung angur. Iba linük nung COVID-19 tashidak züina akumba mechi anogo 15 lockdown benoktsü lia Nepal nung nung nung nisung meyerijang aika linük yimtiba yutsür ogo. Iba lockdown ya linük nung yimti aser jila tulutem ajunga nung benoka lir.

Kathmandu, Rongchii/April 29 (Agencies): Coronavirus cases asendenshir jatetshiba ajanga Nepal yimtiba, Kathmandu aser danga yimti tulutem lockdown tenzüker, ta ketdangsürtemi ashi.

Lockdown ya hopta ka atema alitsü, ta Kathmandu indang chief district officer Kali Prasad Parajuli-i ashi.

"COVID-19 tensa dak ajemdaker tenokdangba ya tajemba agi hopta kabo atsülangtsü," ta Parajuli-i osangbener dang ashi.

Kathmandu aser temeket district tem nung police temi checkpoint tem amenoka gari aser tetsüng agi senzürtem anendakja liasü. Ozüng sülen manidakba mechi gari karbo puogo.

Nepal nung tang tashinung COVID-19 agi nisung 312,699 menepogo, active cases 30,209

li aser nisung 3,211 süogo, ta health ministry ajanga ashir.

Virus ya Mount Everest indang base camp nunga putet, kong tenemi atur nisung noklang aika alima nung tenemkolak talangtibai atutsü temelaba atatepa lir.

Taküm Mount Everest tenemi atutsü atema nisung 408 nem temelaba agütsüogo, ta Nepal indang Health Department ajanga ashi.

Sorkari tongtipang business aser services tem dak alaka tanüngba ajunga nokdangba aser Kathmandu Valley, Lalitpur aser Bhaktapur district tem nung tongtipang masüba nung nüburttem senzüsempongtsü memelar.

Tenokdangba agüja aliba nung manidaker mesüra face mask magirtem tepuokdak ita ka ayutsü mesüra senchi sen 500 achitsü mesüra anaprong

agi merenshitsu, ta ketdangsürtemi ashir.

Ajisüaka international aser domestic flights tem temelensh mali, ta ashi.

Sorkari bendanger atema arrtsü tem shibang, saka kidanger linük, India nungi senso tem coronavirus tendangba nung iba tashidak maliba indang kuli den anogo ter quarantine atema hotel makaa ayuba kuli dener aittsü melar.

Iba linük nung coronavirus mozü agütsüba maparen January ita tenzüker aser nisung million 1.9 nem India aser China-i agütsüba mozü agütsüogo.

Ajisüaka ketdangsürtemi India mesüra danga lenmang nungi mozü tali bener marutetba ajanga mozü agütsüba maparen ya anendaktsü akok, ta ashir.

White supremacy ya kiralongraba lir: Tir Biden

Washington, Rongchii/April 29 (Agencies): US Congress nung mezüngbuba jembiba mapang, Tir Joe Biden-i, white supremacy (temesüng nisung ya kin ajak dang temaba ta bilemba) ya linük telungzük nung kiralongrar lir, koba America nungeri kanga kumdangtsüla, ta ashi.

Rara agi raksar aliba Afghanistan linük nungi America nung nung sepaitem anizüker arutsü lemtetba indang jembiba mapang, alima nung kiralongrar tesendaktep ya timba linük alema ogo aser bendanger tsükchir dang nungi white supremacist temi timtem tuluba agütsür, ta Biden-i ashi.


"Tanü asen linük asoshi kiralongrar tamajungtiba ta asen itdangiter temi ngutetba asenoki senzüka meyutsütsü: White supremacy ya kiralongraba lir," ta Biden-i House chamber nung ashi, kong 2020 tir election result magütsü meranga taoba tir Donald Trump busemer temi ita asem tajakdang amokbangtsü

meranga liasü. "White supremacy ya kiralongra mapa lir, aser asenoki ibaji senzüka meyutsütsü. Külem America nungertem, ajiang, iba linük tanüla aneptsü asoshi asenok lungjemtsüla," ta tiri ashi.

January 6 nü Capitol nung sorkar anema tashiyim amshia nokdaktsü merangba ya democracy tendangba timtem teraksa ka lir, ta Biden-i ashi.

"Taonung asenok yangi adenshiaka, mit tamajung nisung telok kari iba Capitol sapang nung temeshi democracy menentsüba asenok ajak molungjang nung lir. Asenok takum aika lendong nung yutsü. Takum sama. Tasütait molungsentsü balaka aitdaktsü. Sorkar anema tashiyim amshia nokdaktsü merangba ya democracy tendangba timtem teraksa ka lir," ta Biden-i ashi.

Ajisüaka iba timtem madak takok ngutetogo aser asen democracy ya teti alitsü, koba kanga tejen aser tang nüngdakba ka lir, ta pai ashi.



Washington nung aliba US Capitol nung Congress senden ka House Chamber nung amendang United States Tir, Joe Biden-i jembiba mapang tangokba noksa ka yangi angur. Noksa nung Biden tesülen abelen tsütsü Vice President Kamala Harris aser achichilen House Speaker Nancy Pelosi na mena aliba angur.

Myanmar nung tayimtsü anendak tesem ana amak

Naypyitaw, Rongchii/April 29 (Agencies): Myanmar nung tayimtsü anendak tesem ana nung amak, kong tesem ka nung ola tulu adoka apok aser ka nung rocket khaloktsüba nguogo, ta osangtem ajanga ashi.

February 1 nü mitkartemi sorkar atsüngdokba ajanga Myanmar nung ita asem tashi mepetmesü adoka aruba mapang mejangjaba nisungtemi Brehostibarnü iba lendong ya agütsü. Tang tashi shingaiia tenüng agia mali aser asü-amaba osangtem mali.

Mitkartemia osang kecha sangdonga mali.

Brehostibarnep Magway jila anasa tayimtsü anendak asemben apokba ola angashi, ta Delta News Agency ajanga Facebook nung sangdong.

Iba lendong atalokba sülen tayimtsü anenba tezülen lenmangtem nung sepa tali asendenshia lir, ta osang ajanga ashi.

Mapang tatsüka lir Magway

northeast tsütsü tayimtsü anenba tesem tongtiba, Meiktila nung rocket pongu khaloktsü, ta osangbener Than Win Hlaing-i ashi, shiba lendong atalokba mapang tayimtsü anenba tesem anasa liasü.

Pai Facebook nung video ka post sütsü, aser yangji rocket arua apokba ola angashi.

Brehostibarnü Karen aser Kachin state tem nunga sorkar meyong sepaitemi telungpur dak amakba osangtem lir, ta osang ka ajanga ashi.

Mitkari tentetba sorkar anemer rongnung Karen National Union (KNU) ya tejangja telok ka lir, aser mitkari sorkar atsüngdokba anema longkak aiter dak tashiyim amshiba atema parnoki mitkar lenirtem aija arur.

February ita sorkar atsüngdokba sülen linük anüdoklen arrtsülen KNU litsü nung mitkar den raraba tali kumogo, kong taoba ita

mitkartemi tayimtsü amshia amak, koba Karen state nung küm 20 dak tema nung mezüng atalokba alitsü.

Arrtsülen sepaitemi telungpur den küm aika rara arur, saka linük tiyongtsülen mitkar tashi ita alidak iba ama lendong agütsüba yabo aiben majangshi.

Anung San Suu Kyi-i anir election ajanga shimtetba sorkar atsüngdokba sülen democracy busema longkak aiter temi yimti aser jila ajunga anokshija arur, aser mitkartemi tashiyim amshia nokdakba mapang nisung 756 tepsetogo, ta telok balalai ashir.

Linük tesem ajungalen maneni longkak aiter, aser Sagaing region aser Kachin State kübok Hpakant jila nunga nüburttem longkak aitba osang lir.

The Irrawaddy osangkaket ajanga social media nung noksa ka prokshiba nunga linük nung democracy tanaben benoktsü takhangba agüja Mandalay nung nüburttem adenshia

yimtung nung jajaba nguogo.

Myanmar indang Southeast Asia kidanger temi iba timtem nungi anitetsü asoshi lenmang bushiba samaa aoba mapang iba tensa ya ajurur.

Linük ter züngsema aliba Association of Southeast Asian Nations (ASEAN) senden ka Honibarnü Indonesia yimtiba nung mitkar lenir Senior General Min Aung Hlaing den mena liasü aser mapang tatsüka lir azüdokshi anena mitkar lenirtem aser civilian tem tsüngta jembishinütsü mechi onük pongu nung molungtepa liasü, ta sangdong.

Saka mitkar yimsüsür temi iba onük benokba magizük aser tensa tajungba akumba mapang shisadangtsü ta ashi aser mitkartem sentong ang agüja liasü.

Mitkari kumtetba sorkar anema nokdaktsü asoshi Myanmar nung democracy busemer temi telungjem sorkar ka tentet aser parnoki yimten yimsüsür pua aliba mechiok

tashi linük nung rongrong adoka aliba indang mejembitsü, ta ashir.

Yimten yimsüsür anema nokdaker ajemreptsü temolungtetba lir ta sayua, state television ajanga Bodhbarnü menur sangdong ka nung ashiba agi, democracy busema longkak aiter lenir ka nisung tepsetba aser linük kelakoktsüba ken o nung ketdangsürtemi aputsü bushir.

Monywa jila nung April 15 nü arishi küm 25 tain Wai Moe Naing-i anir motorbike rally ka aliba mapang sepaitemi gari nung arua pa mena aliba bike nung atsük aser pa apu.

Monywa nung kidang yangluba grenade kar apokba nung Wai Moe Naing'er telok sendaktepa lir, ta sorkar meyong Global New Light of Myanmar osangkaket ajanga ashi.

"Iba den külemi parnoki March 26 nü police ana reshikangshia amshir tepset," ta osangkaket ajanga ashi.

ADC Jalukie-i ki kar shibangtsüba metetdaksü

Dimapur, Rongchii/April 29 (TYO): COVID-19 tashidak keta aliba potetba sülen COVID-19 tashidak prokshia meyoki nokdanga ayutsü atema ADC Jalukie, Dr. Tinojongshi Chang-i, April 28 nü ki kar shibanga yutsütsü atema tetuyuba agütsüogo. Item kitem ya osang tejangja ka magütsü tashi shibanga atatsü.

Kitem ya:
1. House No. Nil, behind

- Rangkau Petrol Pump, Ward-6 (Keleilwa Colony), Jalukie Town.
- House No. 31, near Baptist High School, Samzuiram Village.
- House No. Nil, Jalukie-B Village.

ADC-isa, nüburtem dang mapang ajak nung mask asemtsü, teka mapangshia metsüka alitsü aser lokti nung tetsüngda ita inyaksangshitsü

atema tetuyuba agütsüogo. Maneni nüburtem tashidak nungi jenboa alitsü atema ki shibangtsür aliba tesemtem anasa merekmejua inyaksangshitsü metetdaksüogo. Tetuyuba sülen manidakertem nem Disaster Management Act, 2005, Section-51 nungi 60 aser IPC Section-188 dak ajemdaker tapet temerenshi agütsütsü, ta ADC-isa metetdaksüogo.

AR-i tashidak tendangba nung teyari agütsü

Dimapur, Rongchii/April 29 (TYO): HQ IGAR (North) tawabangba kübok Assam Rifles Mon Battalion aser Mon civil hospital nungi medical ketdangsurtem longjemer April 29 nü SDO office & Power Department, Nagnimora, Mon District nung inyakerterem Rapid Antigen Test ajanga tashidak tendangtsüogo.

CMO, Mon ajanga nisung

20 RAT test sütsütsü atema mepeshiba agizükba sülen Unit Hospital nungi medical team kati item nisungtem dak tashidak tendangtsü. Tensa majungba mapang civil ketdangsurtem nem takokba tashi teyari agütsütsü nangzüker aliba ama Battalion-i takokba tashi inyaka arudar.

Tashidak tendangba

mapang COVID guidelines tem ajak benoka inyaksangshigo aser lokti nung tetsüngda ita inyaksangshitsü tetuyuba agütsür aliba tali nenshia metetdaksüogo. Medical team-i mapa tajung benoka inyakba atema Nagnimora nung aliba nüburtem aser sorkar tenzükerteremi kanga pelaba lemsatepogo.

Pungro jila nung

"Sunrise Road" lapokogo

Dimapur, Rongchii/April 29 (TYO): Pungro jila nung April 28 nü ADC Pungro, Abhinav Shivam, IAS-i, "Sunrise Road" lapoktsüogo.

Pungro jila kübok forest ward aser Pungro yimtsüng na sendaktepba lenmang, koba kanga nüngdaka liasü, iba lenmang ya Yimchunger Tribal Council (YTC) aser District Administration Pungro tekolak ser Pungro jila nung alirtem aser lokti tentet balalai senotsü teyari agüja yangluogo.

June 18 nü Dhanush indang 'Jagame

Thandhiram' sayatsü

Mumbai, Rongchii/April 29, 2021 (Agencies): Actor Dhanush indang Tamil film - 'Jagame Thandhiram' ya alima tesem ajunga nung OTT (Over The Top) sabang ajanga June 18, 2021 nü sayatsü terenemba lir.

Iba film nung Dhanush den Aishwarya Lekshmi, Kalaiyaran aser Joju George nung külemi shilem agiba angutsü. Kasa mapang, iba film ya Scottish actor James Cosmo indang mezüng Tamil film alitsü.

Jagame Thandhiram ya Karthik Subbaraj-i direct süogo aser film ya tajung aser tamajung tsüngda shima inyaksü asoshi telok kati inyakba otsü ka lir.

"Mapang talangka nungi yongya ataba 'Jagame Thandhiram' maparen tembangogo. Alima tensa dak rangloker atalokba otsü ka ama iba film ajanga terepranger tem atsüa arutsü teimla lir," ta director Subbaraj-i lemsatep.

Ajay Devgn-i BMC den longjemer Medical Unit ka lapoktsüogo

Mumbai, Rongchii/April 29, 2021 (Agencies): Mumbai yimti nung



Covid-19 tashidak agi kongshir alirtem atema emergency medical facility agütsütsü nükjidong nung Bollywood star Ajay Devgn-i temai madokdaksüi meimbanga BMC pur den inyaka arudar.

Emergency service tajungtiba achayangtsü asoshi BMC commissioners, corporators aser sendaktepa alirtem mazüngi inyak yongjia, Devgn-i parnok maparen nung külemi teka amtepa nungitdaka.

Tanhaji film nung tongti shilem agisang, Devgn aser film wadang tsütsü külemi inyakerterem longjemer Mumbai

indang Shivaji Park nung emergency medical unit ka amenoktsü asoshi BMC nungita yariogo.

Osang ajanga angazükba agi, BMC-i Shivaji Park nung Bharat Scouts & Guides Hall ya '20-bed' COVID-19 facility agi melentsüogo, kong ventilator oxygen support aser para monitor dena lir. Iba facility lapoktsü atema Devgn-i pa indang social service wing NY Foundations ajanga senotsü tenla agütsü.

Devgn dak alia, film yanglur Anand Pandit, Boney Kapoor, Luv Ranjan, Rajneesh Khanuja, Leena Yadav and Ashim Bajaj; OTT giants Sameer Nair (Applause), Deepak Dhar & Rishi Negi (Banijay Asia, Seven Taurus Entertainment Private Limited), entrepreneur Tarun Rathi aser Action-Director R P Yadav nungeria "Smiley Account" nung sen cr. 1 dak tema tenla agütsüogo. Smiley Account ya BMC indang business development cell lir, ta kasa sangdong ajanga metetdaksü.

Taoba küm Dharavi nung Devgn-isa ventilator tem tenla agütsüba ajaki jangjaa lir.

Office of the
Molungyimsen Baptist Arogo
P.O. Tuli, Pin- 798618
District Mokokchung, Nagaland

TENÜNGSANG AGÜTSÜR

Tasütait, ochishir lenir, **Rev. Dr. L Kari Longchar**, Missionary At Large, Chungtia, Pai nüborrem tenzüka wadang balala nung bendanga agüja tenzüka ajiteta Senate of Serampore University ajanga pa nem Honorary Doctor of Divinity agütsüba tepela tenüngsang Molungyimsen Baptist Arogoi agütsür.

Tsüngremi tsürabuur, lenir taküm tarutsü jenjang nung maneni ajungketa moajang aser amshiang ta Arogopuri sarasademtsür.

Kibuba mapa nung,

Sd/- Rev. S Tajung Pastor	Sd/- Y Sunep Tzudir Asso. Pastor cum Secretary
--	---

SÜR KÜM KA AJUNGBA MENUNGRA BILEMTETER




Asür Imsüwaden
(Asü April 30, 2020)

Nai onok toktsür orr küm ka jungogo, saka na onok mulung nung teti alir. Onoki na anogoshia kanga menungrar. Na yimjung nung anisüngzü kang. "Atangji züngpong ni nenok dang shiti, kari kü o benshira, pai kodanga tasüba mangutsü."

Temeim Kinungtsü, Jabaso aser Kinungertem.

SÜR KÜM KA AJUNGBA MENUNGRA BILEMTETER



ASO:
31.08.1942

ASÜ:
30.04.2020

Onoki teti meima aliba ozü tebu Lt. **L. Sentinungsang** (Chuchuyimpang) sür küm ka ajungba anogo.

Oba na onok nungi pilar joko tanü küm ka abensa arudang, na onok den meliaka onoki teti nü mapa tajung, sayubentsü O tajungtem kodanga onoki amatsü makoker.

Kenü anogo asenek ajak tepela nung ajuruteptsü sarasadema atar.

Temeim Kinungtsü, Jala-Jabaso, Semchir aser Anükapang, kinungertem

MENUNGRA BILEMTETER



30.4.2020

30.4.2021

Lt. L. Among Jamir (Changtongya)

Oba, Tanü anogo nai onok toktsür orr küm ka abensar. Na mali onok kanga azüngmeyaka kümogo, akümüli nung na meliaka onoki na teti meimer aser menungrar. Nü temeim shisatsü aser sempet tajungtem onok mulungjang nung teti lir.

Kenü anogo asenek ajak Kibuba tsüngdang tepela nung ajurutsü sarasadema atar.

Temeim kinungtsü, jala, jabsotem aser kinungertem.

Tsüngremlar Rev. S. Imrongtuden (Akhoya) Küm 75 ajungba Tepela Salem lemsateper. (30th April 1946 to 30th April 2021)



Tanü Kibubai moatsüba senti anogo tajung ka nung na tasoba küm Neter Pungo abensaba Tepela Salem lemsatepba den nü nem Konang, Akhüm & Tetushi agütsür. Ajioda, asen Teyanglur Tsüngremi Pa Mepet Tongshi aser Mi Tongshi agi iba Akümüli tepeyong ania nü nem arishi talang den anema aliba taküm moajangma ta sarasademtsür.

Temeim Kinungtsü, Chirnur, Anükapang & Semchirtem.

Asian Boxing Championship UAE-i belenerogo

Rongchii/April 29, 2021 (Agencies): Asian Boxing Championship koba India nung taruba ita asayatsü liasü, iba asayamung ya Dubai-i belenerogo. India nung COVID-19 tensa kanga mejungi akümba ajanga asayamung belener ao, ajisüaka national federation aser UAE boxing federation na longjemer iba asayamung ayongzüka asayatsü.

Iba asayamung ya linük yimtiba kübok Indira Gandhi Indoor Stadium nung May 21 nungi 31 tashi asayatsü liasü, kong anogo nung nisung 20,000 tema dak Covid tashidak poteta arudar.

"Linük balala nung India-i maotsü atema tenokdangba agütsür aliba ajanga Boxing Federation of India (BFI)-i Asian Boxing Confederation (ASBC) den ken o angatetteper taruba ASBC Asian Elite Men and Women Boxing Championships 2021

edition Dubai nung asayatsü atema telemtetba agiogo," ta BFI-i ashi.

"Iba asayamung ya BFI aser UAE Boxing Federation na longjemer ayongzüka asayatsü," ta kasa sangdong ajanga metetdaksü.

Anogoshia nisung lakh 3 tema dak tashidak potetyonga aruba sülen linük aikati tayimtsütem India-i aotsü aser India nung arutsü tenokdangba agütsüogo.

"Wara pokteter aliba ajanga linük balala nung senzusenpong dak sendakba nung tenokdangba agütsür aliba ajanga BFI aser ASBC nati asayamung tanga tesem ka nung asayatsü telemtetba agi," ta BFI-i ashi.

BFI tir Ajay Singh-i, telemtetba agitsü tasak liasü saka agitsü nungdaka liasü, ta ashi.

"India nungi belener orr tanga tesem ka nung asayamung asayatsüa

akümba ya kanga tia maka. Delhi nung iba asayamung ayongzüka asayatsü kanga yongyaa liasü, saka tanga lenmang kecha mali," ta pai ashi.

"Onok atema boxer tem tekümzüka nung toktsütsüji tongtibangtiba lir anungji iba telemtetba agitsüsa aküm. Onoki tensa kanga junga asadang aser ASBC o India sorkar den ken o angatettepa sülen Dubai nung iba asayamung ayongzüka asayatsü asoshi telemtetba agi," ya pai ashi.

Kasa mapang nung ASBC-ia, national federations ajak nem iba asayamung May 21 nungi June 1 nü tashi asayatsü lemetba metetdaksüogo.

Iba asayamung atema India tebur team nung asayartem tang tashi mesangdongi lir saka tetsür team bo sangdongatokogo aser MC Mary Kom (51kg)-i anir tetsürtem asayatsü.

Jordan nung arishi küm 19 tain Boxer ka süogo

Rongchii/April 29, 2021 (Agencies): Arishi küm 19 tain Jordan nung Rashed Al-Swaisat Hombar aonung Kielce, Poland nung mozüki ka nung süogo. Tawa tembangba AIBA Youth World Boxing Championships nung pa tekolak yiruba sülen anogo 11 lir süogo.

Iba asayamung nung India team temaba jenjang nung tembang. India nung arishi küm 19 tain Rashed Al-Swaisat mang ayimer aser par kinunger aser tembarm den medal asem kotteta liasü. India sülen tanabuba jenjang nung Russia team liasü. Parnoki gold asem, silver pongu aser bronze asem angu.

Under-81kg nung Estonia nung Anton Winogradov den tsüngtepba mapang round asemububa nung laoba sülen Al-Swaisat ya April 16 nü mozükidangi anir ao aser tekelok surgery agia liasü.

Jordan Olympic Committee (JOC)-i, boxer sang indang noksa ka den asükhü lemsatepogo. "Jordan Olympic Committee-i youth category nung national boxing team asayar Rashid Al-Swaisat asüba osang angazüka mang ayimer,

shiba April 16 nokingsütsü World Youth Championships nung asayaba mapang yiru aser Hombar aonung tulusang Tsüngrem dangi ogo," ta Olympic Committee-i ashi.

"JOC tenüng nung tir, Prince Faisal bin Al Hussein aser Board of Directors züngsemtem aser Jordan nung saisapong dak sendaka alirtem ajak Al-Swaisat mang ayimer aser par kinunger aser tembarm den asükhü lemsateper," ta kasa sangdong ajanga lemsateper.

JOC-isa, parnok indang social media profile pictures tem parnok indang logo tanak aser temesüng version kati melenshi.

Kasa mapang nung International Boxing Association (AIBA)-ia asükhü lemsatepogo. "Jordan nung Rashed Al-Swaisat asüba osang angazüka temulung koremer, shiba AIBA YWCHs nung asayaba mapang April 16 nü mozükidangi anir ao. Onoki par kinunger, medemer aser teammate tem atema aria bilemteper," ta AIBA-i sangdong ka ajanga lemsateper.

Rajasthan Royals-i Covid-19 den raratsü atema sen crore 7.5 tenla agütsü

Rongchii/April 29, 2021 (Agencies): India nung Covid-19 wara agi kongshir alirtem nem teyari agütsütsü atema Rajasthan Royals-i sen crore 7.5 (USD million 1) tenla agütsütsü telemtetba agiba sangdongogo.

"Asayartem den team kibur aser management-i sen bendentsü mulungtet aser Rajasthan Royals indang philanthropic arm Royal Rajasthan Foundation (RRF) aser British Asian Trust (BAT) den longjemer inyaka liasü," ta RR sangdong ka ajanga metetdaksü.

"BAT-i, maparen aika nung India sorkar den longjemer

inyaka aruogo aser talisa skills aser education dak sendakba nung inyaka aruogo. Trust ngutetsang Prince Charles-i, emergency "Oxygen for India" sentong ka tenzü, koba oxygen concentrators alizüka lemshitsüba dak rangloker inyakdar. Mozükitem nung supply agi anünga mapang iba device yagi mopung nungi oxygen agizüka shirangertem yaritetsü.

"Rajasthan Royals-i bendenba sen yagi India ajunga nem teyari agütsütsü. Mezüngbo iba sentong ya Rajasthan state dak rangloker tenzü, kong Ranjit Barthakur

lenisüba nung RRF-i sentong aika nem teyari agüja arudar.

"Asayartem aser team kiburtem longjemer inyakba ajanga iba jenjang tongtetogo aser iba ajanga timtem mapang teyari agütsütsü aser nüburttem nem tashidak agi tonger temang anepaluba mapang tenüngdaktiba; Oxygen alizüktsü asoshi teyari agütsütsü," ta RR-i ashi.

Anogo ishika tejakdang Kolkata Knight Riders nungi Australia nung asayar Pat Cummins-ia India nung mozükitem atema oxygen supplies alitsü asoshi USD 50,000 tenla agütsüogo.

World Athletics Relays nung India-i shilem magitsü

New Delhi, Rongchii/April 29, 2021 (Agencies): India nung Covid-19 tashidak puteter timba akümba asadanteta, Amsterdam tashi India team indang tayimtsü thitsüba sülen India tsür nungtugu sprinter Hima Das aser Dutee Chand nati Olympic qualifying World Athletics Relays nung shilem magitetsüsa akümer.

Iba Olympic qualifying asayamung ya May 01 aser 02, 2021 nü asayatsü renema lir.

Brehostibarnü (29.04.2021) tetsür - 4x100m aser tebur 4x400m relay team anaprongla KLM flight nung Amsterdam tashi aotsü renemer liasü, saka Hombar nikongdang nungi tenzüka Netherlands sorkar ajanga India nungi aruba tayimtsü tem anentsü.

India nungi Poland tashi indang indanga aoba tayimtsü mali asünung, Athletics Federation of India-i asayamung ayongtsü aliba tesem - Silesia, Poland tonga aotsü asoshi Europe yimti nung tanga tayimtsü ka mekaa ayutsü

asalentong yangludat.

"Iba World Relay asayamung nung India-i shilem magitetsü ama tebilemteper tulu adoker. Europe linük aika nung India nungi aruba tayimtsü tem anenja lir. Ajasünung, iba timtem ajanga onok tetsükdaksü adoktsü aser team-i asayamung nung shilem magitetsü akok," ta AFI ketdangtsür kati ashi.

"Europe yimti talisa Frankfurt nungi athlete tem Poland tashi aotsü lenmang kar danga bushitsü asoshi onoki sorkar aser embassy den jembitepsü merangdar. Kasa mapang Dubai mesüra tanga West Asian yimti tashi athlete tem yoktsü asoshi merangdangdar," ta ketdangtsüri ashi.

S Dhanalakshmi, shiba taoba ita Federation Cup asayamung tetsür 100m asemtepba final nung Dutee tsükdaksü, Archana Suseendran, Himashree Roy aser AT Daneshwari nung den la-a team nung anisema

liasü.

Chorzow, Silesia nung asayatsü aliba Relay asayamung nungsa India nungi tebur 4x400m team ka yoktsü sentong lir.

Iba World Athletics Relays nungi temaba tema 8 tashi Tokyo Olympics atema indang indanga qualify asütsü.

Tetsur 4x400m relay team nung züngsem ana dak tali temang nung timtem aliba ajanga iba team asayamung nungi tukuogo.

Doha nung 2019 World Championships final tongtetba sülen, India nungi temeyoktep 4x400m relay team ya Tokyo Olympics atema qualify süogo.

Tokyo nung aruya aliba Olympics atema AFI-i tetsür 4x100m relay team dak teimla tulu liasü.

2019 küm April ita Doha nung Asian Athletics Championships asayar külen nungi India nung sprinter atema iba World Relays ya mezüng international asayamung tongtibang ka alitsü.

Nagaland nung April 30 nungi... (Tapak 1 nungi...)

District Administration, Police, Security Forces/Agencies and Medical and essential Service Providers like Treasury, Fire & Emergency Services, Home Guards & Civil Defence, Prisons, PHED, Power, NIC, DIPR, Postal Services, Food & Civil Supplies, Social Welfare, IT&C, Veterinary & Animal Husbandry, Municipalities/Councils, AIR, Doordarshan, BSNL, Public Sector Banks, ATMs tang amai dang inyaksangshia aotsü.

TEINTET ROGO ASER TANURTEM:

Arishi küm 65 ser temapurtem, mashisa tetsürtem aser arishi küm 10 ser teküpokpurtem kanga kümdangtsüla.

CONTAINMENT ZONE:

District ketdangtsürtemi MoHFW tetuyuba nung ajemdaker Containment Zones latettsü aser ibaji Deputy Commissioner temi osang metetdaksütsü aser State/ UT sorkartemi MOHFW dang abentsü.

Deputy Commissioner temi aniba District Task Force (DTF) temi temalen agüja aliba aser National Directives for COVID 19 Management akangakanga bentsütsü. Nisung kari tashi mangara Disaster Management Act, 2005 nung Arrla 51 nungi 60 aser IPC nung Arrla 188 kübok merenshitsü ta sorkarisa metetdaksüogo.

Kohima nung 29 buba.. (Tapak 2 nungi...)

Osang ka ajanga ashiba agi, tanünga menden ya election masü saka selection yimya nung shimtsü akok.

Tanü nungi tenzüka nomination form agütsür aser vote ya secret ballot ajanga asüng nikongdang 3:00 ako nungi 5:00 ako tsüngta agütsütsü aser kasa anogosa election indang osang sangdongtsü, ta pai ashi.

Vote 34 lir, aser federating unit shiai vote ana-na agütsütsü, ta paisa ashi.

Anepdang 8:50 ako nungi sentong tenzütsü, kong Minister, Housing & Mechanical aser taoba tir Tongpang Ozukum tesemdanger tongti alitsü aser Morung Express indang publisher, Akum Longchari onük jembir asütsü.

NPF MLA aser taoba NSF tir Y Vikheho Swu-i mungdang shibangba sentong moatsütsü, koba nikongdang 5:30 ako nungi tenzütsü, aser iba sülen bonfire alitsü.

BILEMDANGANG

"Na makümba ajanga tangar nem timtem tagütsü."